



1. Laevertraon

Käöke kós ich van det greij
ich zeen mien mam nag sjtaon
't mós en zoj d'r in eine keer in
dae vettige laepel laevertraon.

Ziej haaj 't bèste mit mich veur
en 't woor toch wörkelik zó gezóndj
groot en sjterk waerdes se d'rvan
mer 't plekde waal fies in de móndj.

Haajs se 't aafgesjlik den kwoom mit 't röpse
dae nutte sjmaak döbbel zo sjtrang nag èns baove
allè, doe kries get limmenaad d'rachteraan
mer den gèn genäöl meer, det mós se belaove.

Woor ze eindelijk laeg, die fles laevertraon
den brook mam geweun 'n nuje aan
noe guf 't vitamines in capsules of tablette
veur de kienjer van vandaag is 't käöke van de baan.

2. Haje van

Haje van is emes gaer zeen
sónger d'r get veur truuk te vraoge
want es se emes de wètte sjtèls
höbs se euver de leefde gelaoge.

't Is aevel neet erg óm 'ns get te winse
det heurt d'r in 'n relasie bie
want dörve zègke waat se neudig höbs
maak ouch dae angere richtig bliej.

Is d'r van twee kenj genóg respek en leefde
zin d'r klam nag versjille tösse 'dich' en 'mich'
want ein dink moog toch dudelik zin:
leefhöbbe duis se neet mit 'n maot of gewich.

3. De Maas

Mienne pap noom mich vreuger dök mit nao 't water
det broesend geweld hoot de Maas, leerde ich later
sjoeverend keek en loesterde ich, niepend in zien handj
mien sjoontuupkes waal 'ne maeter van de kantj.

Jaore zin v'r same nao det plekske gegange
höbbe oerelank dao aan 't water gesjtange
dae appaarte lóch in de naas, de windj in de haor
en alzelaeve nootj mit zjwaegele klaor.

De Maas heurde 't aan, ós leef en ouch ós leid
veur 't nao hoes gaon wore ós köpkjes laeg gewejd
det höb ich nàg, zelfs mit euversjtæke op 't vaer
mer 't leefs gaon ich toch nao det eine plekske haer.

Dunbiej det vertroewde, broesende geweld
veul ich pap zien handj, die de miene vashèt
wie aad ich ouch waer, det zal nootj euvergaon
dao aan de Maas kump d'r naeve mich sjtaon.

4. Sjakie

V'r numde um Sjakie van de coöperatie
hae woor 'ne vlokkere, goodlachse jóng
biej dreug waer sjtóng hae boete te kaere
ouch wo nieks loog, nemes dae 'm zielig vónj.

Biej Sjakie zoot de lach op 't gezich geplek
hae kós neet lere, mer woor ech neet gek.

Doe hoofdes 'm mer get te vraoge
hae leet de bessem valle veur dich
rende zich de bein ónger de vot oet
mit altied en eewig det bliej gezich.

Soms maakde v'r waal 'ns 'n prätje
hae wis van alles biejein te klasjenere
det ich dao lang neet alles van begreep
kós Sjakie allesbehalve waardere.

Toch bleef dae lach op zien gezich geplek
hae kós neet lere, mer woor ech neet gek.

Lang geleje bön ich vertroch oet det dörp
mer es ich nag 'ns door de Sjoolsjtraot riej
en ich sjtèl mich veur wo de coöperatie loog
den is det toch altied mit Sjakie d'rbiej...

5. Denske

Kóm 'ns aeve mit mich danse
't hoof neet oppe maot te zin
en doe moogs gerös get sjroevele
bietje plekke, wie in 't begin.

Heurs se det aad milledieke
waard veur waard zing ich 't mit
't kump get lèstig oet mien sjträöt
mer det lik aan mien kunsgebit.

En mien veutje det get sjeif geit
duit det van de rimmetiek
trouwes ich heur neet gans tegooj
zet 'ns get heller dae meziek!

Ocherm, höbs se 't op de häöpe
gank mer rap zitte, leeve sjat
al wilt 't lief neet altied loestere
toch höbbe v'r waal weer lol gehad.

6. Daag leef miens

Dao bös se weer, verfroemmelde sjoet
óm die vaje en rumpels lach ich dich oet
get krejjepeutjes, zoget duit mich nieks
vlekskes... 't loont neet des se d'r haer kieks.

Vandaag is 't mit knotere 'ns aeve gedaon
want kiek dichzelf hiej veur de sjepegel sjtaon
aan 't begin van 'ne daag mit nuuj kanse
óm joeks te make, te sjanse en te danse.

Óm det sjepegelbeeld good veur 't lepke te haje
die lachrumpelkes nág deper biejein te vaje
want det wickske, dao örges deep van binne
wilt bès nag waal 'ns get lolligs verzinne.

Laot neet de laeftied dien druime bepaole
't geit d'róm, die ouge te laote sjtraole
bön noe 'ns zélf dienne beste vrundj of vriendin
gun dich óm te beginne 'n portie gooj zin.

Dus daag leef miens, lach nao dien eige gezich
en nao dae kleine óndeug dao-binne...
veur det wich is dit gedich.

7. Maondjig

Sónjessaoves sjtóng in de keuke
op 'n driepotig petroolie-sjtèl
de kaetel mit witte was te kaoke
det Soda-söpke pröttelde hel.

'Maondjig - wasdaag' woor de regel
't witte good mós weer zuver wie sjnee
iddere hoesvrouw sjmaondjes aan de was
gluif mer neet det mam get anders deej.

Gans vreug sjörgde ze 't wasmesjien nao boete
allereers ging die veurgekaokde was d'rin
't mesjien aansjlingere, Persil of Sunil d'rbiej
van hoes gaon haaj sjmaondjes totaal gèenne zin.

Want det wasmesjien mós in de sjmieze gehaje
es 't lang genóg gedrejd haaj, mós 't nate greij d'roet
gluijend heit, dus mit 'ne grote hóltere knieper
mer soms sjoebde ze op mich, want...

... den woor dees druimvot weer 'ns vergaete
de döbbele sjtóffe knuipkes oet de sjlope te doon
es zón dink tösse de vring in sjtökke knalde
vónj ziej det netuurlik allesbehalve sjoon.



De kaokend heite was waerde oet 't mesjien drupend van 't sop door de vring geduujd daonao mós gesjpeuld, gevrónge, gesjpeuld tössedoor waerde 't water tig kere vernuujd.

In de lèste bak sjepeulwater kwoom 'Pupke Blauw' en sjolke en lakes waerde mit Crackfree gesjteve nag èns door de vring, den eindelijk aan de draod woveur pap betonne päöl in de gróndj haaj gedreve.

Dem zien lang óngerbókse van Jansse en Tilanus hónge naeve mam häör ketoene direktwaar ze waerde vanwaege sjeet al 'ns oetgesjtökkerd nemes vónj det toentertied sjaemel of raar.

Badsjtóf damesbendjes hónge ouch aan de lien sjlum tösse de handeuk en beddelakes versjtop wejde 't get hel, den kwome ze aan 't leech en sjaamdes se dich es maedje de uig oet de kop.

Al vroor 't det 't kraakde, de was mós aan de lien op 't inj van de daag alles sjtief wie 'n plank es ich dae krempel den 'ns aaf mós haole leek dae wasdraod te hoog en döbbel zo lank.

Binne kós 't wasgreij weer langzaam óntdeuje róndjóm de kachel, op houte rekskes en sjeul daags d'rnao waerde gesjtreke, sónger sjtouw 't invóchte van de was ging gans op geveul.

Aan 't inj van de daag loog 't greij weer zuver gesorteerd en op sjtaepelkes in de linnekas gater en sjeure wore innegang gerippereerd en de laeg wasmanj gaapde weer nao nuje, voele was.